

II - ARABAKO LURRALDE HISTORIKOAREN TOKI ADMINISTRAZIOA

AGURAINGO UDALA

Behin betiko onestea Aguraingo udal aterpetxearen erabilera eta funtzionamendu araudia

Jendaurrean egoteko epean erreklamaziorik aurkeztu ez denez, Aguraingo udalbatzaren 2023ko martxoaren 30eko erabakia behin betiko bihurtu da automatikoki. Erabaki horren bidez, hasierako onespena eman zitzaion Aguraingo udal aterpetxearen erabilera eta funtzionamendu araudiari, eta haren testu osoa argitara ematen da, guztiek jakin dezaten eta Toki Araubidearen Oinarriak arautzen dituen apirilaren 2ko 7/1985 Legearen 70.2 artikuluan xedatutakoa betetzeko.

Aguraingo udal aterpetxearen erabilera eta funtzionamendu araudia

Lehenengo kapitulua. Izaera eta xedea

1. artikulua. Araudi honen xedea Aguraingo udal aterpetxearen erabilera eta funtzionamendu baldintzak arautzea da.

2. artikulua. Done Jakue Bideko erromesen ostatu eta egonaldiako ekipamendua da aterpetxea.

3. artikulua. Udal aterpetxea Aguraingo Foru kaleko 11. zenbakian dago.

4. artikulua. Aterpetxea udalarena baino ez da antolaketari, funtzionamenduari eta hornidura ekonomikoari dagokienez, eta Aguraingo Udalak du kudeatzeko, aldatzeko edo azkentzeko modua erabakitzeko ahalmena.

5. artikulua. Aterpetxeak ez du nortasun juridiko propiorik; zuzenean kudeatutako zerbitzua da, eta Aguraingo Udalaren zerbitzuak antolatzeko eta emateko ohiko arau eta praktika orokorren mende dago haren administrazio araubidea.

Bigarren kapitulua. Ostatu hartzeko eta erreserbatzeko baldintzak

6. artikulua. Aterpetzeko zerbitzuak eta gelak erabiltzeko, Aguraingo Udalak onartutako indarreko tarifak ordaindu beharko dira.

7. artikulua. Ostatu hartzea eskatzen dutenek adinez nagusiak izan behar dute; 18 urtetik beherakoek, berriz, adinez nagusi den pertsona batekin egon behar dute beti.

8. artikulua. Udal aterpetxean gehienez lau egun batez egon ahal izango da, baina alkatetzak egonaldi luzeagoa baimendu ahal izango du, salbuespenezko egoeren ondorioz.

9. artikulua. Aterpetxean ezin da erre eta ezin da kontsumitu edari alkoholunik edota estupefaziaterik, eta ezin da animaliarik sartu, jabearen ardurapean dauden txakur gidariak izan ezik.

10. artikulua

1. Egonaldi eskaera alde aurretik erreserba eginez baino ezin izango da egin, udalaren webgunearen bidez erabiltzaileen eskura jarriko den aplikazio informatikoaren bidez.

2. Erreserba egin, ordaindu eta onartu ondoren, eskatzaileari gako bat emango zaio, aterpetxean sartu ahal izateko.

3. Erreserba pertsona bat baino gehiagorentzako eginez gero, pertsona horien guztien identifikazio datuak (izena, abizenak, sexua eta NANA) agertu beharko dira.

4. Litera bakoitzeko pertsona bakarrarentzako egin ahal izango da erreserba.

11. artikulua. Erreserba ezeztatuz gero, ez da itzuliko ordaindutako zenbatekoa.

Hirugarren kapitulua. Bizikidetza arauak

12. artikulua. Arau orokorrak

- Pertsonen eta aterpetxe barruko bizikidetza, higiene eta garbitasun arauak bete behar dira.
- Errespetu osoz jokatu behar da aterpetxean lan egiten duten pertsonekin eta gainerako erabiltzaileekin.
- 23:00etan itxi baino lehen sartu behar da aterpetxeko instalazioetara.
- Gauean gainerako erabiltzaileen atsedena eta loa errespetatu behar da (isiltasun ordu-
tegia: 23:00etatik 06:00etara).
- Ezin da arroparik, oinetakorik edo bestelako objekturik zintzilikatu leihoetan.
- Egonaldiaren lehen egunean 13:00etatik aurrera sartu ahal izango da.
- Egonaldiaren bigarren egunean 10:00 baino lehen irten behar da.
- Erabiltzaile guztiek kontuz zaindu behar dituzte eraikina, instalazioak eta altzariak, batez ere logela eta litera, eta ezingo dute kartelik jarri, ez eta aipatutako horiek honda ditzakeen bestelako objekturik ere. Egotzi ahal zaizkien kalte guztien erantzule izango dira, eta, hala badagokio, gorabeheren berri eman beharko dute Aguraingo Udalean. Nolanahi ere, lagatako instalazioak edo gauzak kaltetu dituen eragindako kalte galeren erantzule izango da.
- Oro har, ez da onartuko aterpetxeko erabiltzaileak bisitatzea instalazioaren barruan.
- Sarrera ukatzeko eskubidea dago, aterpetxeko gainerako bezeroei edo bertako langileei eragozpenak eragin edo errespetua galduz gero.

13. artikulua. Logelak

- Udalak ez du bere gain hartuko erabiltzaileen gauzak lapurtu edo hondatzearen erantzukizuna.
- Ezin da janaririk edo edaririk biltegiratu edo kontsumitu geletan.
- Beheko izarak eta burkoaren zorroa prezioan sartuta daude, baina ez oheko arropa, zeina erabiltzaile bakoitzaren kontura izango baita.
- Literak hutsik izan arren, erreserban markatutako litera erabili behar da.

14. artikulua. Sukaldea eta jangela

- Aterpetxeak ez du bere gain hartuko sukaldean/jantokian dauden edariak eta elikagaiak lapurtzearen edo hondatzearen erantzukizuna.
- Aterpetxeak hozkailua, sukaldea eta mikrouhin labea ditu bezeroen eskura, baita sukaldeko oinarrizko tresnak eta baxera ere. Horiek guztiak arduraz erabili behar dira. Erabiltzaile bakoitzaren betebeharra da tresnak eta sukalondoa garbi uztea erabili ondoren.
- Ezin izango dira altzariak, koltxoak eta aterpetxeko gainerako objektuak kanpora atera. Erabiltzaileek altzarien ordena eta banaketa errespetatu behar dituzte.
- Segurtasun arrazoiak direla eta, guztiz debekatuta dago labeak, berogailuak, metagailuak eta abar erabiltzea.

Lauugarren kapitulua. Erabiltzaileen eskubideak eta betebeharrak

15. artikulua. Eskubideak

- Instalazioak erabiltzea, ordenantza honen eta aterpetxeko barne araudiaren arabera.
- Erreserben aplikazio informatikoaren bidez erreserbaren baldintzak egiaztatzen dituen egiaztageria lortzea.

– Kexak edo erreklamazioak aurkeztea; horretarako, baliabide egokiak izango dituzte eskura (erreklamazio orria eta gogobetetasun galdetegia).

– Aplikatzekoa den indarreko legerian aitortutako beste edozein eskubide.

16. artikulua. Betebeharrak

– Araudi honetan ezarritakoa betetzea.

– Instalazioak eta ekipamendua eta zerbitzuak behar bezala erabiltzea.

– Aguraingo udaletxean jakinaraztea instalazioetako funtzionamendu arazoak, hausturak eta hutsuneak.

– Gainerako erabiltzaileen eskubideak errespetatzea, eta une oro beste erabiltzaileekiko bizikidetzaren erraztea.

– Ezarritako prezio publikoa ordaintzea.

– Errespetatzea aterpetxea irekitzeko eta ixteko orduak, bai eta isiltasun ordutegia ere.

– Indarrean dagoen legeriaren edo araudi honen ondoriozko beste edozein betebeharrak.

Bosgarren kapitulua. Zehapen araubidea

17. artikulua. Araudi honetan edo Aguraingo alkateak edo hark eskuordetutako zinegotziak araudi hau aplikatzeko emandako jarraibideetan xedatutakoa ez betetzea zehatzeko moduko arau hauste administratiboa da.

Araudi honen arau hauste larririk eginez gero, erabiltzaileak berehala atera beharko dira aterpetxetik, eta, horrez gainera, kasuan kasuko erantzukizunak eskatu ahal izango zaizkie.

18. artikulua. Kanporatzeko eta hurrengo urtean aterpetxean sartzea debekatzeko arrazoiak izango dira, besteak beste, honako hauek:

– Nahita edo utzikeriaren ondorioz kalteak eragitea aterpetxeko instalazioetan eta gauzetan.

– Zerbitzuen ordena egokiaren eta aterpetxearen erabiltzaileen arteko bizikidetzaren kontrako portaera izatea.

– Aterpetxeko instalazioak eta gauzak haien berariazko xede ez diren helburuetarako erabiltzea.

Seigarren kapitulua. Erreklamazioak

19. artikulua. Erabiltzaileek dituzten eskubideak bermatzeko, erreklamazio liburu bat egongo da aterpetxean bertan. Edozein erabiltzailek, NANA edo pasaportearen erakutsi ondoren, erreklamazio liburua erabili ahal izango du. Liburu horretan, erreklamazioarekin batera, izen-abizenak, sexua eta helbidea jaso beharko dira. Garaiz, forma egokian eta idatziz erantzungo zaie erreklamazioei.

Araudi honetan edo Aguraingo alkateak edo hark eskuordetutako zinegotziak araudi hau aplikatzeko emandako jarraibideetan xedatutakoa ez betetzea zehatzeko moduko arau hauste administratiboa da.

Zazpigarren kapitulua. Azken xedapenak

– Araudi honetan xedatutakoaren interpretazioari buruz sor daitekeen edozein zalantza Aguraingo alkateak edo hark eskuordetutako zinegotziak ebatziko du behin-behinean, eta haren ebazpenak berehala betearaztekoak izango dira.

– Aguraingo alkatearen edo eskuordetutako zinegotziaren eskumena da araudi honetan ezarritakoa garatzen duten jarraibideak eta zirkularrak onestea.

– Aguraingo alkateak edo eskuordetutako zinegotziak zerbitzuaren baldintzak aldatu ahal izango ditu, premiazkoa edo ezinbestekoa den edozein arrazoi delako medio.

Administrazio bidean behin betikoa den erabaki honen aurka administrazioarekiko auzi errekurtsua aurkez daiteke Euskal Autonomia Erkidegoko Justizia Auzitegi Nagusiko administrazioarekiko auzien salan, iragarki hau argitaratu eta hurrengo egunetik bi hilabete pasatu baino lehen, bat etorritik Administrazioarekiko Auzien Jurisdikzioaren uztailaren 13ko 29/1998 Legeak 10. eta 46. artikuluan xedatzen duenarekin.

Administrazioarekiko auzi errekurtsua jarri aurretik, berraztertzeke errekurtsua jarri ahal izango da, erabaki hau hartu duen organoari zuzendua. Horretarako hilabeteko epea izango da erabakia argitaratu eta biharamunetik hasita.

Horrez gainera, bidezkotzat jotzen den beste edozein errekurtsu aurkeztu ahal izango da.

Agurain, 2023ko ekainaren 1a

Jarduneko alkatea

ERNESTO SAINZ LANCHARES